

Seni Preseten
Dieter F. Uchtdorf

Aruemonun Chon Aninis
non ewe Aewin Presetensi



Sipwe Pwapwa Ren

Nupwen ua ekieki usun ach kewe neuwo chon sai, eu mettoch a tonong non mokurei ina ewe kon “Come, Come, Ye Saints” (*Hymns*, no. 30). Ekkewe ir ra sai nangatam ngeni ewe nenien Salt Lake ra konu ei kon non ar sai.

Ua fakkun sinei pwe ekkena Sounang rese pwapwa ren mettoch meinisin. Ra chou fan weiresin samau, pwichikar, pekus, patapat, niuokus, echik, metek, tipemwaramwar, me mano.

Nge ina mo mi wor chommong popun ra tongeni pupuchor, “Meinisin ese och,” ra kaeo och ekiek minne sia fakkun tongei ikenai. Ra nenneno seni ar weires me ra nenengeni efeioch ese much. Ra netip kinisou ren non-nomur. Ina mo a pwa pwe meinisin ese och, ra konu ren unusen pochokunen ngunur, “Sipwe pwapwa ren!”

Ach ingeiti ekkewe chon sai akkomw ese masou ika pwe ese efisata ennetin ach nengenocho pwisin manau-ach. Upwe aporaus ekkoch kinikinin manauer a apocho-kunaei nupwen ua ekieki usun ar asor me pwon.

Tong

Ekkewe chon sai akkomw ra tongei emon me emon neir ina mo nonnomun emon non pekin moni, are ekiekin non pekin government. Ina mwo nupwen a amanga ar sai, efisata weires, are a wewen asor me angang weires, ra aninis fengen nefiner.

Non ach fonufan ikenai mi uren akkachocho me aimufesen, an emon mochen a tongeni auchea nap seni tumunu ekkoch are apochokuna ewe muun Kot. Nein

aramas ikenai, ach feita ngeni mochenin ach ekiek a tongeni nikinikinin aukukun ochun kich.

Kokkot ngeni me apwonueta mochenin netipach a tongeni fakkun och. Nge nupwen ach apwonueta mochenin netipach a efisata pwe sise afanni, sia nikitano, are sia efeiengawa ekkoch, niwinin ach fefeira mi fakkun watte.

Ekkewe chon akkomw ra mamma ekkewe ir ra fitir, nge ra pwan ekieki usun ekkewe aramas repwap feito mwirir, ra fotuki ira fan iten ekkewe mwichen aramas ra tapweno mwirir.

Ra sinei ewe pochokunen famini me chiechi. Me pokiten ra anongonong won emon me emon, ra pochokununo. Chiechi ra winiti famini.

Ekkewe chon akkomw ra ew ochun aninis me achema pwata sipwe pichino seni sossotun ach sipwe anaemon chok, iwe nge, sipwe eitau pouch ngeni emon me emon me sipwe tong fengen nefinach.

Angang

“Feito, Souneng, ousap niuokus.”

Ekkei kapas ra winiti eu konun apochokunen ekkewe chon sai mi pekus. A weires pwe sipwe sinei ifa weiresin an ekkei aramas angang. Ar fetetan chok mi eu mettoch ra fori mi mecheres. Ir meinisin ra angang fengen pwe epwe wor aner mongo, pwe repwe for sefanni waar kewe, tumunu maan, efeiochu ekkewe mi samau me apwanga-pwang, kutta me angei konik, me tumunur pwisin seni ekkewe osukosukun fan nang me ekkewe osukosuk mi nom nein petewen.

Ra pwaata iteitan nesesor ren popun me kokkot mi fatoch minne ir meinisin ra weweiti: pwe repwe angang ngeni Kot me chon orur me repwe tikeri non ewe nenien Salt Lake Valley. Iteitan ran ar popun me kokkot mi fatoch ngenir; ra sinei met mi namwot repwe fori me mi auchea pwe repwe feita ngeni ar kokkot iteitan ran.

Non ach ei fansoun—minne chommong met sia mochen a mecheres pwe sipwe angei—sia sossot pwe sipwe kunnuno are fangeta nupwen ewe an mwach a nikinikin osukosuk are a chukuchukuta mwach. Non ekkena fansoun, meni epwe apochokunakich pwe sipwe ekiiki usun ekkena mwan, fefin, me semirit rese mutata pwe samau, weires, metek, me mano epwe erikireno seni ewe an ra finata.

Ekkewe chon akkomw ra kaeo pwe non ar fori mettoch mi weires a apochokuna inis, tupw, me ngun; a awatteno ar weweiti napanaper non pekin nang; me a awatteno ar tong fan iten pwan ekkoch. Ei angang a apochokuna ngunur me a winitu eu feioch ngenir fansoun mwirin ar sai nein petewen me ekewe chuk a wesino.

Epinukoch

Nupwen ekkewe chon akkomw ra kon, ra konu aununatin nesen: “Nge ren pwapwa fetanno won om an.”

Mi aosukosuk pwe non ei fansoun sia feioch ren chommong mettoch nge sisap pwapwa. Ekkewe amwararan feifeita me napanapen technology ra ekkis meinisin me a awora ngenikich ren tumun, minen apwapwa, pwapwa muttir chok, me mecheres. Nge ekkis meinisin kich sia kuna chommong rese pwapwa.

Ekkewe chon akkomw, minne ra asorano chommong, rese angei chommg mettoch me ra echik fan iten ekkewe minen amanau aramas. Ra weweiti pwe pwapwa ese feito pwe niwinin ar seroch are inet chok. Wesewesen ese feito seni meinisin ach mochen repwe pwonueta. Pwapwa ese feito seni pisek are nonnomun manau. A feito seni me non ngun—ina mo met a fis unukuch.

Ekkewe chon akkomw ra sinei ena, me ra ena napanapan ngun ra kuna pwapwa iteitan fansoun me non sossot meinisin—pwan non ekkewe sossot ra wesewesen aosukosuka anonnonun ngunur.

Sossot

Fan ekkoch sia nenengeni won met ekkewe chon sai akkomw ra engino non me sia apasa, “Kinisou pwe use

manau non ena fanosun.” Nge ua ekiiki ika ekkena chon sai akkomw, ra tufichin kuna kich ikenai, repwe pwan apasa ekkena chok sokkun kapas.

Ina mo a sokkono fansoun me nonnomuch, ekkewe nongonongun weri sossot me nonnom fengen pwe kich aramasen tong me fan Kot rese siwin.

Seni ekkewe chon sai akkomw sia tongeni kaeo pwe sipwe nuku me epinukunuku non Kot. Sia tongeni kaeo pwe sipwe tongei aramas. Sia tongeni kaeo pwe angang me achocho ra efeiochukich non pekin inis me non pekin ngun. Sia tongeni kaeo pwe pwapwa mi kawor ngenikich ese nifinifin nonnomun manauach.

Ewe napanap mi och sipwe sufoniti me pwarata kinisou ngeni ekkewe chon sai akkomw ina seni ach sipwe anne-asosichi an Kot kewe annuk, sipwe tongei chon unukuch, me sipwe angang weires, epinukoch, me sipwe pwapwa usun chok ekkewe chon sai akkomw ra pwarata non pwisin manauer.

Nupwen sia fori iei, a usun pwe sia tongeni eitau pouch kewe ngeni fansoun nom, sipwe angei poun ekkewe chon sai akkom, me sipwe fitir non ach konu: “Sipwe pwapwa ren! Sipwe pwapwa ren!”

AFANAFAN SENI EI POROUS

Meni kopwe mochen poputani ren ami konu “Feito, Souneng” (*Hymns*, no. 30) ren ekkewe ir ka churi. Ka tongeni poputa ren porausom are emon ka sinei a aea ekkewe nongonongun tong, angang, are epinukoch. Ika ka mefi, ka tongeni pwarata usun ekkewe feioch ra feito seni om manaueni ekkei nongonong me kopwe pwon ngeni ekkewe ir ka churi pwe ra tongeni angei feioch usum chok.

SERAFO

Makketiw eu Rekot

Preseten Uchtdorf a awewefengeni ach kei ran me fansoun ekkewe chon sai akkomw. Ina mo kese mo sai won ewe an nein petewen, ka usun chok ekkewe chon sai akkomw nap seni ka nuku! Ka pwan tongeni pwarata tong, angang weires, me epinukoch. Me usun chok sia sinei pwe ekkewe chon sai akkomw ra pwarata ekkei kinikinin manau pokiten ekkewe rekot ra makkei, mwiri-mwirum ra tongeni sineok seni noum puken achechem.

Kopwe nounou fitu minich pwe kopwe makketiw ekkis porausen manauom non noum puken achechem. Ka tongeni makkei usun mettoch non pekin ngun, usun chok porausen om angei kapasen pwarata are ifa usun ka pworacho ngeni osukosuk ren aninis seni Semach won Nang. Ka pwan tongeni anisi tettenin noum kewe (minne ra tongeni aneani noum puken achechem fan eu!) pwe repwe sinei ifa usun manauom iteitan ran. Met sokkun mettoch ka fori non sukun? Ifa nikinikinin rumwom? Met ka asa pwe ka chechemeni seni om famini?

Nupwen ka makketiw ekkis iteitan ran, kopwe tongeni kunaochu ren fatoch ifa usun Semach won Nang a anisuk non manauom iteitan ran, usun chok A emweni ekkewe chon sai akkomw, nge kopwe pwan affata ngeni mwirimwirum usun ochun manauom.

© 2015 seni Intellectual Reserve, Inc. Meinsin pung mi kawor. A för non Amerika. Kapungunon non fosun Merika: 6/15. Kapungunon chiakun: 6/15. Chiakun First Presidency Message, July 2015. Chukeese. 12587 901

SEMIRIT

Tapweno Mwirin an Ekkewe Chon Sai Akkomw Nenien Appiru

Preseten Uchtdorf a aporaus a ekkoch napanap minne ekkewe chon akkomw ra pwarata tong ren Semach won Nang. Ka tongeni tapweno mwirin ar nenien appiru. Ikkei ekkoch ekiek ra nom fan pwe kopwe poputa:

TONG

- Kopwe makkei echo taropwe are kopwe fori mongo fan iten emon mi netipechou.
- Kopwe anisi emon chienom chon sukun ren an angangen sukun.

ANGANG

- Kopwe finata eu mettoch kopwe angang ngeni. Kopwe fori och mettoch iteitan ran non ei maram minne epwe anisuk pwe kopwe apwonueta.
- Kopwe anisi semom me inom ne fori anemi mongo.

EPINUKOCH

- Kopwe fori tettenin 10 mettoch mi apwapwa non manauom.
- Kopwe emenimen ngeni aramas meinsin ka kuna.



Nuku, Famini, Aninis

Ekkewe Napanapan Manauen Jises Kraist: Omusomus me Umoumoch

Anneaochu me ikiotek usun ekkei mettoch me kutta met kopwe aporaus. Ifa usun om weweiti usun manauan me angangen ewe Chon Amanau epwe tongeni anapano om nuku non I me efeiochu ekkewe aramas ka tumunu non om angangen an fefin chon amua? Ren pwan ekkoch poraus, kopwe nengeni reliefsociety.lds.org.

Iei ew kinikinin ew kumien Porasen Fefin Chon Amwa mi pachenong napanapan ewe Chon Amanau.

Weweiti pwe Jises Kraist a omusano tipisich me a umoumoch ngenikich a tongeni anisikich pwe sipwe omusano tipisin ekkoch me sipwe umoumoch ngenir. “Jises Kraist mi ach Nenien Appiru,” Preseten Thomas S. Monson a apasa. “Manauan mi eu manauen tong. A echikara ekkewe mi semwen; ekkieta ekkewe ra puratiw; epichano mi tipis. Non ewe nesoponon ewe mwichen aramas mi song ra angei Manauan. Nge mi chok chiwen ngieta seni chukuchukutan Golgotha ekkewe kapas: ‘Semei kopwe omusereno; rese sinei met ra fori’— eu kapasen pwarata non manauen inis usun kiroch me tong.”¹

Ika sia omusano tipisin ekkoch, Semach won Nang epwe pwan omusano tipisich. Jises a tingoreikich pwe “umoumoch usun chok Sememi mi umoumoch” (Luke 6:36). “Omusomus fan iten *ach* tipis a fis ren ekkoch annuk,” Preseten Dieter F. Uchtdorf, Oruemon Chon Aninis non ewe Aewin Presetensi, a apasa. “Mi namwot sipwe aier. . . . Kich meinisin, fan eu fansoun me

fan ekkoch, feino non ennetin me sia titingor ren ewe chen? Sia mochen ren unusen pochokunen ngunuch ren umoumoch—pwe epwe museno senikich ach kewe mwanino me ekkewe tipis sia fori? . . . Kopwe mutata An Kraist we Achasefan epwe siwini me echikarata netipom. Tong Fengen Omusano tipis fengen.”²

Pwan ekkoch Wokisin

Matthew 6:14–15; Luke 6:36–37; Alma 34:14–16

Seni ekkewe Pukfel

“Sipwe omusano usun chok sia weri omusomus,” Elter Jeffrey R. Holland seni ewe Mwichen Engon me Ruemon Aposel a apasa.³ Ewe tuttunapen ewe at mi mwanucheno a pwar ngenikich ru kinikinin omusomus: emon nau a museno me ewe pwan emon a weires an epwe omusano.

Ewe nau kukkun a angei nwinin, a muttir anusano, me nupwen a wor nengita, a angang ne amongoni pik. A mak non ekkewe pukfel “a ekiel sefan,” a niwinno ngeni imwen seman me a apasa ngeni pwe ese chuen fich ngeni an epwe noun we at. Nge seman we a omusano i me a

nieno emon kou fan iten kametip. Ewe nau watte a niwinsefan seni an angang non ewe atake me a song. A achema ngeni seman we pwe a angang fan chommong ier, ese mo ataieno ekkewe annuk, nge “kese mo ngeni ei emon sike pwe upwe tongeni fori ew kametip ngeni chienei kewe.” Ewe sam a pwonueni, “Nei at, fansoun meinisin ka chok nonnom rei o mettoch meinisin ai pwan om. Nge mi och ach sipwe pwapwa, pun pwium we a mano, nge iei a manaueta. A monucheno, nge iei a niwinsefanito” (nengeni Luke 15:11–32).

ESINESIN

1. Thomas S. Monson, “Love, the Essence of the Gospel,” *Liahona*, May 2014, 91.
2. Dieter F. Uchtdorf, “The Merciful Obtain Mercy,” *Liahona*, May 2012, 70, 75, 77; esisin mi nom me akkomw.
3. Jeffrey R. Holland, “The Peaceable Things of the Kingdom,” *Ensign*, Nov. 1996, 83.

Ekkieki Usun Ei

Ifa usun omusomus a tongeni efeiochu ewe mi awora omusomus?